

दिनांक 27.03.2025

समय: 18.45 बजे
आकाशवाणी जयपुर—अजमेर

प्रादेशिक समाचार

- राजस्थान दिवस रा सिलसिला मांय आज भरतपुर मांय राज्य स्तर रो अन्त्योदय कल्याण समारोह राखी ज्यो—मुख्यमंत्री भजन लाल शर्मा सरकारी योजनावां रो फायदो हर एक जणा ताई पूगावण बाबत् कह्यो।
- केन्द्र सरकार बेगी ही निजी टैक्सी सेवा री भांत सहकारी टैक्सी सेवा सुरू करेला।
- प्रदेश मांय खाद्य सुरक्षा सूचि ऊं मर्जी ऊं नाम हटवावण सारू चलायी ज्यो गिव अप अभियान री मियाद 30 अप्रैल ताई बधायी ज्यी।
- खेलो इण्डिया पैरा गेम्स 2025 आज पूरा व्हे रह्या है —64 तमगां सागे राजस्थान पदक तालिका मांय चौथी ठौड़ माथे रह्यो।

.....

राजस्थान दिवस साप्ताहिक महोत्सव रा तैत आज भरतपुर मांय राज्य स्तर रो अन्त्योदय कल्याण समारोह राखी ज्यो। ई मौके मुख्यमंत्री भजनलाल शर्मा न्यारी—न्यारी सरकारी योजनावां रो फायदो लेवण वाळां रा खाता मांय रकम भेजी अर न्यारा—न्यारा कार्यक्रमं री सुरूआत कीनी। मुख्यमंत्री 20 हजार पिरवारां ने स्वामित्व कार्ड योजना रा तहत् पट्टा बांट्या। वे माटी कलाकारां ने बिजली ऊं चालण वाळा चाक अर दिव्यांगजन ने पावर ड्रिवन व्हील चेयर अर सहायक उपकरण ई दीना। ई मौके मुख्यमंत्री गांवां रा विकास रा नुवा ई वर्क पोर्टल 2.0 अर मोबाइल एप री सुरूआत ई कीनी। श्री शर्मा पण्डित दीन दयाल उपाध्याय गरीबी मुक्त ग्राम योजना, दादू दयाल घुमन्तु सशक्तिकरण योजना, मां योजना के तहत न्यू पैकेज, मां—नैत्र वाउचर योजना अर गुरु गोलवलकर आशान्वित ब्लॉक विकास योजना समेत न्यारी—न्यारी योजनावां ऊं जुड़्या दिशा—निर्देश जारी कीना। कार्यक्रम मांय मुख्यमंत्री भजन लाल शर्मा कह्यो के अन्त्योदय कल्याण री योजनावां माथे राज्य सरकार खास ध्यान दे रही है। श्री शर्मा कह्यो के सरकार पण्डित दीन दयाल उपाध्याय री अन्त्योदय री सोच ने आगे बधा रही है। वे जनता ऊं सरकारी योजनावां रो फायदो हर एक जणा ताई पूगावण सारू आगे आवण री अपील कीनी।

.....

राज्य स्तर रो ओ जळसो जिला स्तर माथे राखी ज्यो कार्यक्रमं मांय ई सजीव बतायी ज्यो। मुख्यमंत्री ई दौरान न्यारा—न्यारा जिलां मांय सरकारी योजनावां रो फायदो लेवण वाळां सागे वर्चुअल तरीका ऊं बातचीत ई कीनी। इण ऊं पैली श्री शर्मा आज जयपुर मांय पुलिस री डोढ़ सौ नुवी गाड़ियां ने हरी झंडी बतायी। आं मांय पुलिस थाणा री गाड़ी, फील्ड मांय जावण सारू पुलिस रा अहलकारां री गाड़ियां, हाईवे रेस्क्यू वाहन, मोबाइल इन्वेस्टिगेशन यूनिट अर ट्रूप कैरियर वाहन शामिल है। राजस्थान दिवस रा सिलसिला मांय पर्यटन विभाग री ओर ऊं जयपुर मांय सप्ताह भर ताई न्यारा—न्यारा कार्यक्रम राख्या जा रह्या है। आज जंतर—मंतर परां विशेष योग्य जन बच्चां सारू **“देखो अपना शहर”** जागरूकता यात्रा निकाळी ज्यी। ई मौके उपमुख्यमंत्री दिया कुमारी बच्चां सागे बातचीत कीनी।

राजस्थान दिवस रा सिलसिला मांय चाल रह्या कार्यक्रमों री कड़ी मांय काल भीलवाड़ा मांय सुशासन समारोह अर 29 मार्च ने कोटा मांय युवा अर रोज़गार उत्सव राख्या जावेला। 30 मार्च ने राजस्थान दिवस रे मौके जयपुर मांय ज़ोरदार जलसो व्हेला, जद के 31 मार्च ने निवेश उत्सव मणायो जावेला।

000

सूचना प्रौद्योगिकी अर संचार विभाग री ओर ऊं जयपुर मांय 'राजस्थान आईटी दिवस 2025' समारोह राख्यो जा रह्यो है। दो दिन रा ई समारोह रो मकसद नौजवानां, स्टार्टअप्स, निवेशकां अर उद्योग जगत ने एके सागे ला र तकनीकी नवाचार ने बधावो देवणो अर मदद रा नुवा मौका मुहैया करावणो है। म्हाणा खबरनवीस बतायो के जलसा मांय चार हजार ऊं बत्ता लोग सिरकत कर रह्या है।

.....

सरकार बेगी ही सहकारी टैक्सी सेवा सरू करेला। केंद्रीय गृह अर सहकारिता मंत्री अमित शाह आज लोकसभा मांय आ जाणकारी दीनी। वे कह्यो के सहकारिता रे मार्फत मुहैया करायी जावण वाली आ सेवा उबर अर ओला सरीखा मॉडल माथे काम करेला। श्री शाह कह्यो के कुछ ही महीनां मांय सहकारी टैक्सी सेवा सरू दुपहिया, टैक्सी, रिक्शा अर चार पहियां वाली गाड़ियां रा नाम माण्ड्या जावेला। वे सहकारी बीमा कम्पनी बणावण री बात ई कही जो देश मांय सहकारिता प्रणाली रा दायरा मांय बीमा कारोबार करेला।

.....

प्रदेश मांय गिव अप अभियान री मियाद 30 अप्रैल ताई बधा दीरीजी है। पैली आ तारीख 31 मार्च ही। ओ अभियान खाद्य सुरक्षा सूचि ऊं अपात्र लोगां रा नाम वां री मर्जी ऊं हटावण सरू चलायो जा रह्यो है। खाद्य अर नागरिक आपूर्ति मंत्री सुमित गोदारा बतायो के 1 नवंबर 2024 ऊं हाल ताई राज्य मांय 15 लाख ऊं बत्ता लोग खुद री मर्जी ऊं वां रा नाम नाम खाद्य सुरक्षा सूचि ऊं हटवा लीना है।

000

आज विश्व रंगमंच दिवस है। मनोरंजन रा हलका मांय रंगमंच रा काम अर महत्त्व ने बतावण रा मकसद ऊं हर साल 27 मार्च ने ओ दिन मनायो जावे है। इण रो ई साल रो मुद्दो है— **"रंगमंच और शांति की संस्कृति"**। प्रदेश मांय लोक नाट्य अर रंगमंच रो इतिहास घणो जूनो है। प्रदेश रा न्यारा-न्यारा हलका मांय भांत-भांत री नाट्य विधावां रो चलन है। आं मांय तमाशा शैली सब ऊं नुवी है। पेश है एक रपट—

.....

भीलवाड़ा मांय आज रंग तेरस रो पर्व पारम्परिक उमाव सागे मनायी ज्यो। ई मौके कोड़ामार होळी खेली ज्यी। म्हाणा खबरनवीस बतायो के शहर मांय न्यारी-न्यारी ठौड़ां मनायी ज्यो रंगोत्सव मांय लोग अर लुगाइयां बढ़-चढ़ र सिरकत कीनी।

.....

ज़िला रा मांडल मांय आज ऐतिहासिक नाहर नृत्य रो कार्यक्रम राख्यो जा रह्यो है। इण मांय पारम्परिक वाद्य यंत्रां री धुनां बीचे नाहर रो स्वांग रच र नाचे है। इण मांय उपमुख्यमंत्री डॉ. प्रेमचन्द बैरवा रे ई शामिल व्हेवण रो कार्यक्रम है।

.....

खेलो इंडिया पैरा गेम्स 2025 आज पूरा व्हे रह्या है। आठ दिन री चैंपियनशिप मांय तीरंदाजी, एथलेटिक्स, बैडमिंटन, पावरलिफ्टिंग, निशानेबाजी अर टेबल टेनिस री होड़ां मांय एक हजार तीन सौ ऊं बत्त पैरा खिलाड़ी सिरकत कीनी। आं मांय राजस्थान सोना रा 22, चांदी रा 18 अर कांसा रा 24 तमगां सागे कुल 64 तमगा जीत र चौथी ठौड़ माथे रह्यो। राजस्थान रा खिलाड़ी तीरंदाजी मांय सोना अर कांसा रा 1-1, एथलेटिक्स री होड़ां मांय सोना रा 16, चांदी रा 14 अर कांसा रा 16, बैडमिंटन मांय सोना रो 1, पावर लिफ्टिंग मांय कांसा रा 3, निशानेबाजी मांय सोना रा 4, चांदी रा 2 अर कांसा रा 3 अर टेबल टेनिस मांय चांदी रा 2 अर कांसा रो 1 तमगो जीत्यो। हरियाणा 104 तमगां सागे अव्वल रह्यो।

.....

आईपीएल टी-ट्वेंटी क्रिकेट रा तैत आज हैदराबाद मांय लखनऊ सुपर जायंट्स रो मुकाबलो सनराइजर्स हैदराबाद ऊं व्हेला । ओ मैच अब ऊं थोड़ी देर पछे साढ़े सात बज्यां सरू व्हेला ।

.....